

venam cubitalem corii, limbo externo basiqve cunei albidis et innotatis, saepe tamen etiam ubique aequaliter punctata, apice cunei interdum fuscescente vel ferrugineo; membrana albida, venis flavis, areolis totis (vel tantum areola minore) fuscescentibus, limbo externo macula magna vel vitta lata oblonga e medio marginis exeunte et apicem membranae attingente intusqve ad spatium mox infra apicem venae cubitalis prolongata nigricante; vena brachiali extus apicem versus fusco-marginata. Alae hamo areolae venaque decurrente ex eodem puncto excurrentibus. Pectus et abdomen virescentia; hoc maculis marginalibus in femina ochraceis. Pedes albido-virentes vel -flavescentes, tibiis tarsisque albidis, femoribus supra et subtus punctis interdum magnis interdum minoribus densius conspersis, tibiis spinulis albis e punctis nigris nascentibus, apice articuli ultimi tarsorum ungviculisqve nigro-fuscis.

2. *Solenoxyphus crassiceps* REUT.

Tab. IV, fig. 6. Tab. I, fig. 12 a (caput).

Diagnosis: Dilute flavo-virescens, subtiliter albo-pubescentis, capite interdum dilute fuscescente, pronoto scutelloque linea longitudinali virescenti-alba notatis; pronoto in ♀ limbo postico minute fusco-consperso; hemelytris albidis femoribusqve, his supra tantum apice, subtus totis, punctis fuscis minutis dense conspersis; tibiis spinulis pallidis, in certa luminis directione fuscis, e punctis parvis fuscis nascentibus; cuneo saepe flavescente; membrana albida, venis dilute flavescentibus. Long. ♂ $2\frac{3}{4}$ ♀ $3\frac{1}{2}$ mm.

Syn.: *Psallus?* *fusco-venosus* FIEB., Wien. ent. Monatschr. VIII, 330, 16! *).

Hab. in Rossia meridionali (Sarepta!), nonnulla specimina D. Prof. FREY-GESSNER benevolissime communicavit.

Descr.: Corpus dilute flavo-virescens, subtiliter albo-pubescentis. Caput pronoti basi tantum $\frac{1}{4}$ (♂) vel $\frac{1}{3}$ (♀) angustius, antice visum longitudini latitudine aequale vel sub-aequale, clypei basi in linea intermedia oculorum posita, vertice oculo circiter $\frac{1}{3}$ (♂) vel fere duplo (♀) latiore; saepe apicem versus dilute fuscescens, linea media longitudinali virescenti-albida. Oculi ferruginei vel badii, maris fortiter convexi, in genas longius extensi, feminae in genas parum extensi. Rostrum testaceum, basi virescens, apice fusco. Antennae articulo primo apicem clypei attingente, secundo latitudine capitis postica paullo (♂) vel vix (♀) longiore; virescenti-albae, articulo secundo saepe apice paullo ferrugineo. Pronotum dilute flavo-virescens vel virescenti-flavum, lateribus saepe paullo saturatius virescens, linea media praesertim postice distinctiore albicante, limbo postico feminae minute fusco-consperso; apice longitudine $\frac{1}{3}$ — $\frac{1}{4}$ latiore. Scutellum dilute flavo-virescens vel virescenti-flavum, plerumqve linea media al-

*) Nomen FIEBERI in hac specie, normale constructa, ne minime quidem quadrat; monstrositatem membrana lineis longitudinalibus et transversis pluribus hic illic reticulatim conjunctis FIEBER descripsit; specimina tamen anormalia, illa signatura notata, nec nisi rarissime occurrunt, quapropter nomen a D. FIEBER datum mutandum esse censeo.